

Powšitkowne WOZJEWJENJA

njedźelu, 8. decembra 2019

Swjedzeń Marije bjezhrěšneho podjeća

Póndźelu tola žane kemše w Róžeńce

Boža mša k wysokemu swjedženjej Marije bjezhrěšneho podjeća w Róžeńce budže tola hižo njedźelu, 8. decembra, w 9 hodź. serbsce a w 10.30 hodź. němsce. Po tym su modlerske hodžiny. Póndźelu, 9. decembra, tam kemše njebudu.

Přiležnosć k swjatej spowědži w Róžeńce

sobotu, 14. decembra 17.00 – 18.00 hodź.	farar M. Anders, farar Š. Delan, farar dr. D. Dzikiewicz, farar T. Dawidowski
póndźelu, 16. decembra 17.00 – 18.00 hodź.	farar M. Anders, farar dr. D. Dzikiewicz, farar J. Magjera, kapłan dr. J. Buliš
wutoru, 17. decembra 18.30 – 19.30 hodź.	farar M. Anders, farar dr. D. Dzikiewicz, farar T. Dawidowski, farar dr. B. Dittrich
sobotu, 21. decembra 7.30 – 7.55 hodź.	farar M. Anders, farar M. Nawka, tachantski farar W. Sćapan, farar Š. Delan

Sobotu, 21. a 28. decembra kaž tež 4. januara, njebudže w Róžeńce w 17.00 hodź. přiležnosć k swjatej spowědži.

Na adwentničku do Ralbic!

Adwentnička serbskich młodostnych je tutu njedźelu, 8. decembra, w Ralbicach. Započatk je w 14 hodź. z nyšporom w cyrkwi, kotryž wuhotuje chór 1. serbskeje kulturneje brigady. Po nyšporje zetkamy so na „Radlubinje“ k zhromadnej swačini, hraću hrow a kartow kaž tež k bjesadze. Štóz chce, njech přinjese swójsku hru sobu.

Koparski turněr

Towarstwo Cyrila a Metoda z.t. (TCM) zarjadowuje sobotu, 4. januara, w 15.00 hodź. w Chróšćanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodžiny kaž tež mustwa sportowych jednotkow. Kóžde z nich mělo z wosom hrajerjemi nastupić. Hrać budže so z třomi koparjemi a wrotarjom. Přizjewić měli so mustwa hač do soboty, 28. decembra, pola Guida Zahrodnika w Jaseńcy, telefonowe čisło (03 59 33) 3 11 53, mobilnje (01 51) 52 22 17 59.

Paslenje hodownych darikow

Dekanatne dušepastyrstwo za džěci přeprošuje šulerki a šulerjow 6. do 8. lětnika na paslenje hodownych darikow, kotrež wotměje so sobotu, 14. decembra, wot 9 do 14 hodź. we Worklečanskim Don Boskowym domje. Zajimcy njech so prošu hač do wutory, 10. decembra, pod telefonowym čislom (03 57 96) 88 707 abo z mailku pod worklecya-kise@gmx.de přizjewja. Za wudawki zběra so na wobdźělnika přinošk we wysokosci džesać eurow.

Młodźina na pasionske hry do Oberammergauwa!

Tež 15lětni smědža so wobdželić

Serbscy młodostni su na jězbu wot pjatka do njedzele, 8. do 10. meje 2020, k swětoznatemu pasionskemu předstajenju do Oberammergauwa (blisko Mnichowa) přeprašeni. Wotjězd budže pjatk nawječor. Jónkrótnje poskića tam młodostnym ze wšeho swěta, sej tamnišu generalku wobhladać. Młodostni wot 15 do 26 lět dóstanu zastupny lisćik, kotryž hewak znajmjeńša 150 eurow płáci, za 24 eurow. Po předstajenju změja samo składnosć, so z dźiwadźelnikami rozmołwjeć. Nimo toho postaraja so Oberammergaučenjo wo kwartěry a zastaranje za přihódnu płaciznu. Zastup, zastaranje a nócłěh budže něhdže 60 eurow płacić. K tomu přińdu kóšty za transfer. – Tale jězba by móhła tež hodowny dar młodostnemu być. Nadrobniše informacije su pod www.jugendtage-passionsspiele.de wozjewjene. Přizjewjenja přijimaja so hač do srjedy, 11. decembra, we Worklečanskim dekanatnym młodžinskim dušepastyrstwe přez mailowu adresu don.boskowy-dom@t-online.de. Městna su wobmjezowane.

Silwester do Baćonja

Silwesterski hudźbny nyšpor z meditacijemi k wukóncej lěta wutoru, 31. decembra, w 19 hodź. w Baćonju wuhotuje podobnje kaž loni młodźina Baćońskeje wosady. Wšitcy su wutrobnje přeprašeni.

Hodownej a jubilejnej koncertaj w Radworju

Swojej hodownej a zdobom jubilejnej koncertaj wuhotuje chór Meja skladnostnje swójeho 125lětneho wobstaća sobotu, 4. januara, dwójce w Radworskim hosćencu „Meja“. Prěni koncert w swětle swěčkow budže w 15.30 hodź. Swačina so wot 15 hodź. poskići. Dalši koncert budže w 19 hodź. Přizamknu so reje z kapału CON-TAKT. Wšitcy su wutrobnje do Radworja přeprašeni.